



ATASSUT

UPA14/44-1

Gerhardt Petersen

27.05.2014

Uunga siunnersuut: Akileraarusersuinikkut iliuitsit aqqutigalugit nunatsinni inuit aningaasatigut pissakinnerusut atugaasa, tamatumani anaanaasut ataataasullu kisimiittut arlariinnik meeraqartitertut oqilisaassiffigineqarsinnaanerat pillugu apeqquteqaat aallaavigalugu oqallisissiaq.

(Inatsisartunut ilaasortaq Aqqaluaq B. Egede, Inuit Ataqatigiit)

Matumani Inuit Ataqatigiit sinnerlugit Inatsisartuni ilaasortap Aqqaluaq B. Egede-p apeqquteqaat aallaavigalugu oqallisissiaanut imatut ATASSUT-mit ilanngussaqaasaagut:

Siullermik ATASSUT-mit siunnersuuteqartoq qutsavigissavarput oqallisissiamik saqqummiussaqaqarneranut, ukiunimi makkunani takornartaajunnaarnikuupput anaanat imaluunniit ataatat kisimiillutik meeqqanik perorsaasutut inissisimanerat.

ATASSUT-mit siunnersuuteqartoq isumaqatigilluinnarparput nunatta innuttaasunut tamanut najoruminartuunissaa, taamaattumik aamma isumaqarpugut pingaaruteqartoq ilaqutariittut ingerlaniarnermi atugassarititaasut pitsaasuunissaat. ATASSUT-ip naalakkersuinikkut ingerlatsinerminni pingaartitariuarterpaa inuup akisussaassuseqarluni kiffaanngissuseqartitaanissaa – taamaattumik aamma meeqqanut angajoqqaajusut ilisimaqqissaartariaqarpaat inooqatigiinnermi imminut aammalu ilaqutariinnut pilersuisussaataitanermik akisussaaffeqarnerat taamatuttaaq aamma inooqatigiinerup arlaatigut peqquteqarluni unittariaqarnerani akisussaaffiit suuneri ilisimaneqaqqissaartariaqartut.

ATASSUT-mit isumaqarpugut nunatsinni ilaqutariinnermut aammalumi inooqatigiinnermi ilaqutariittullumi ajornartorsiutinik aniguniarnissamut ikiorneqarnissamut imaluunniit siunnersorneqarnissamut paasissutissanik tigorianaakkanik periarfissat ilaatigut



annikippallaarsorinarsinnaasut, aammalu piffinniit piffinnut periarfissat assigiinngisitaarsinnaasartut.

Soorlu maani Inatsisartuni oqallisissianut allanut tunngatillugu ATASSUT-mit oqaatigisareeripput, sulineq imminut akilersinnaasariaqarpoq, taamatuttaaq aamma ATASSUT-mit isumaqarpugut ilaqutariinneq imminut akilersinnaasariaqartoq - naak immaqa tulluarnepaanngikkaluartoq taamma aningaasanut attuumatillugu ilaqutariinnerup nalilersorneqarnissaa, taamaattorli avaqqunneqarsinnaanngilaq ilaqutariinni meerartaqarfiusuni aningaasartuutit ilaatigut annertusinnaasarmata.

Siunnersuuteqartup ilaatigut eqqaavaa akileraariaaseq ataaseq atorlugu isertitaqqortunerit aammalumi isertitakinnerit akileraartartut, taamaakkaluarpoq, kisianni aamma ATASSUT-mit nalunngilarput isertitakinnerit, kommunimit ikiorsiissutinik assigiinngitsunik periarfissagissaarnerusarmata, tassalu ineqarnermut tapiissutinik, meeqqat tapiinik pisinnaatitaasarput soorlu aamma sumiiffiit ilaanni meeqqat paaqqinnittarfiinut akiliuteqartarnermi annikinnerusumik akiliisariaqartartut sanianilu meeraq isertitaqqortunerulaartunik angajoqqaalik assigiimmik paaqqinnittarfimmi atugassaqaartitaagaluarluni annerusumik akeqartartoq.

ATASSUT-mit siunnersuuteqartoq isumaqatigaarput angajoqqaanut kisimiittunut imaluunniit aappariinnut akunnattumik isertitaqartunut maannakkut inatsisit maleruagassallu atugassarititaasut nalilersorneqarluartariaqartut, taamaattumik ATASSUT-mit Naalakkersuisut Inatsisartullu peqatigalugit piareersimavugut ataatsimuussutsimik takutitsinikkut suleqatigiinnikkut aqqiissutissarsiorinissamut – inuiaqatigiit toqqiissimasumik ineriartortuarnissaannut aqutissiuunneqartuariaqarmata.

Taamatut ATASSUT-mit oqallisissiamut ilanngussaqaalaarpugut, neriulluta aqqiissutissanik nassaarniaqatigiinnissamut isummersuutitta tunngavisseeqataalluarnissaa.